



Sabtu, 06 Mei 2023

Ogen: Joel 2:1-2



Wari Kegelapen



“Black Swan Theory” ndai enggo sigejabken i bas peristiwa covid 19. Labo ise pe si pernah mbayangkenca maka sada doni arus i isolasi. Lebih 2 tahun kerina manusia arus ndahiken dahin arah rumah saja. La banci ertemue, la banci ndahi keteremen, seh maka kade-kadeta pe idilo Dibata lanai banci siarakken ku bas ingan pengadi-ngadinna. Pelaku usaha melala gulung tikar, sura-sura perjabun melala iundurken piah la ka sahun. Kenca bage kerina manusia arus ivaksin massal. Mbue kalak mate perban terinveksi, tapi mbue ka nimpet kesahna, trauma erkiteken kebiaren si secara massif iberitaken i bas media cetak, media elektronik bage pe media social.

Dampak wabah ndai mbue kel kisah-kisah sierbahanca megogo ateta. Lit sada keluarga mate kerina ban covid, lit ka si jadi anak melumang sabap kerin kerina anggota keluarganya mate. Lit kalak sehat tempa ibaba ku rumah sakit, la piga wari sesak jenari mate ka, nadingken tegun lolo, rsd. Bahkan lit sada keluarga 1 bulan kenca penguburen nande i tengah jabu, maka ipebetehken man bana, sabap ia pe paksana erjuang gelah sehat ngulih pasca covid. Luar biasa kegelapen e.

Adi siukuri kai sienggo jadi e, kai lah gegehta selaku manusia ngalaken kuasa Tuhan e. La lit gegehta seakatan ernalem man Tuhan. Bas wari kiniseran e, sangana la lit gegeh tapi ukurta arus tetap erlayas. Sipake kesempatan merenung iadep-adepenNa, lit nge ndia si man pekenan bas kita ntah lang? Lit nge dosa si perlu siakuken ntah pe lagu langkah si man perobahen. *Adi siakuken dosanta man Dibata, isehkenNa me padanNa, ilakokenNa kai si bujur (1 Yoh 1:9)*. La gia sieteh kai si jadi arah lebe, tapi ersikap-sikap erjaga-jagalah kita ibas kiniteken man Tuhan. Sebab bas wari kegelapen e, bas Ia ngenca lit terang si maba ku bas kegeluhen.



[The main body of the page is a large, blank white area with a wavy top edge, intended for writing.]